

醫

門

棒

喝

醫門棒喝卷之三目錄

素問辨疑

論景岳書 附辨日月體象

論易理

平心論

醫門樞喝

卷三

目錄

醫門棒喝卷之三

會稽虛

谷

楠

著

山陰

受業孫廷鉉震遠參訂
雪帆居士田晉元評點

素問辨疑

嘗考靈素內經雖爲醫門之書凡三才生化之道包括無遺而辭簡義廣精蘊難窺又兼世遠年湮多亥豕之訛若不得其解闕疑可也設上下文足以相證

而疑誤顯然者據理辨之以俟明者論定倘不體會本旨使上下融貫合乎義理而率憑臆見以解釋之則穿鑿支離失之遠矣近有淮陰吳鞠通先生著溫病條辨一書其下焦篇有一條云秋濕內伏冬寒外加脈緊無汗惡寒身痛喘咳稀痰胸滿舌白滑惡水不欲飲甚則倚息不得臥腹中微脹小青龍湯主之其自註曰此條以內經有秋傷於濕者以長夏濕土之氣文故畧示門徑經謂秋傷於濕者以長夏濕土之氣

介在夏秋之間、七月大火西流月建申、申者陽氣畢伸也、濕無陽氣不發、陽伸極則濕發重、人感此至冬寒濕相搏而病矣、雖古經脫落燥論、喻氏補之誠是、但不應擅改經文、謂濕曰燥、是不明六氣運行之道也、蓋經所言、乃秋之前半截、喻氏所指、秋之後半截也、余按此說、大乖義理、而評者反贊美之、以爲新奇、眩惑後學、不容不辨、夫經言秋傷於濕、冬生咳嗽兩句、註疏家或解作濕鬱成熱、熱傷肺而冬咳嗽者、猶

爲似是而非今鞠通作外寒內飲解則相去更遠所云脈緊無汗惡寒身痛者卽仲景傷寒論之文也喘咳稀痰等者卽仲景敍小青龍湯證也小青龍湯仲景原爲傷寒挾內飲者設義詳本論毋庸重贅乃鞠通特欲引證內經之文而敍仲景之論加以秋濕內伏冬寒外加二語殊不思仲景但云傷寒表不解心下有水氣其水或因暴傷或係久蓄皆未可知仲景並無明文且水係有形之飲濕爲無形之邪迥然不

同以其水蓄於中，肺氣逆不能降，故或咳或喘。因肺不能通調水道，三焦氣化不宣，故或腹脹而小便不利也。若濕邪爲病，雖亦小便不利，而體重發黃，肢節痠疼等類，亦皆仲景明文，未嘗見有咳嗽者，奈何以飲作濕，將仲景治傷寒挾飲之法，以證內經秋傷於濕，冬生咳嗽之文，可謂張冠李戴矣。此其一也。夫言陰陽進退者，不出乎大易。子月冬至，一陽來復，則陽進陰退，至己月而陽極，以象乾卦。午月夏至，一陰來

第一卷六氣陰陽論
後答問中辨析尤爲
精詳更宜參看

姤，則陰進陽退，至未月，陽雖退而氣尙盛，故與陰爭，爭則有勝負。陽勝則熱，陰勝則濕，濕熱蒸騰，乃名爲暑，故經曰：先夏至爲病溫，後夏至爲病暑也。暑者，陽盛於外，陰長於內，如姤卦而至遯，至否，陰進之象也。譬如火烈水沸，則濕氣橫流，故長夏未月爲濕土之令也。至立秋後，陽漸衰，若否卦之象，不能與陰爭，火力微，則水不能沸，而濕氣遂收，然火力雖弱，陽燄猶存，則反化燥，故秋爲燥金主令也。此陰陽進退氣

自午月陰生而陽退
陰進至未而申畢非
陰氣伸乎若反謂陽
伸則春令寅月當陰
氣伸矣何以名三陽
開泰乎顯然悖理而
評者反贊美之尤不可
解也

化因而變遷皆出自然之理非有所造作於其間者
月建申是陰氣漸伸也今云陽氣畢伸豈有陽已退
位其氣反伸之理若謂秋令陽氣方伸則春令陽氣
當退何以發生萬物恐無是理此其二也由是言之
則春風夏暑秋燥冬寒爲四時之正令經舉四時之
氣所傷以明過時發病之理豈可將秋分作兩截乎
且如所云古經脫落燥論其所指爲秋初之濕然則
應言秋初傷濕不應言秋傷於濕既謂秋傷於濕無

反覆推勘全無義理

訛若補燥論、又當言何時傷燥乎、未免自相矛盾、就如所言、秋初傷濕、冬生咳嗽、然則秋末傷燥、又當何時發病、應作何病乎、再四推敲、實無義理可通、此其三也、當秋初時、以長夏餘濕未盡、容或有之、若卽謂經指此而言、試思歲運有太過不及、客氣有遷移不常、或冬多溫而春多寒者、亦常有之、經何不言冬傷於溫、春傷於寒乎、奈何不顧上文、此其四也、今卽以上文證之、岐伯曰、冬傷於寒、春必溫病、春傷於風夏

獨具慧眼自來註疏
家皆未覩破奇哉

爲飧泄、夏傷於暑、秋爲痃癟，皆言傷正令之邪，而過時發病之理，惟秋爲燥金主令，而獨言傷濕，夫濕土旺於四季，而令主長夏，非秋之氣，則訛誤顯然。但從來諸家，不得其解，而曲爲之說，各執己見，卒無定論。獨嘉言喻先生，直斷濕爲燥字之訛，誠爲千古卓識矣。但又謂經文脫落傷濕一節，予則以爲不然，何也？蓋風寒暑濕燥火，原有六氣，若謂脫落傷濕一節，則火之一氣，仍無着落，良以經文簡質，舉四氣以配四

一語破千古疑案述
爲千古定論以嘉言
之卓識猶見不及此
甚矣讀經之難也

時義已包括無遺何則緣君相二火正當夏令火盛
濕動則名暑今言夏傷於暑則火濕二氣在其中矣
其所以歷舉四時者蓋示人當知凡病不獨時邪又有伏氣發病之理勢有必至者假如夏傷於暑至秋涼風外束其邪淺在經膜間者則發爲痰瘡或內入於腑者則爲腸澼滯下等病皆可類推而知矣此經之辭簡而義廣者也至於咳嗽不離肺病而致咳之由火燥居多卽感風寒而咳者亦邪束內燥之故試
內經論咳分五臟六腑結云此皆聚於胃關於肺則凡咳嗽必

不離於肺病也

脾爲濕土。濕病屬脾。
必無咳嗽。肺爲燥金。
燥病屬肺。無不咳嗽。
至理不移。則經文訛。
誤章不灼然可見乎。

觀仲景之麻黃湯中用杏仁以潤肺燥。理可見矣。若濕邪爲病。證狀雖多。少有咳嗽者。以濕爲陰邪。下先受之。脾土所主。病在肌肉。即使久延。必致腫滿麻痺。身重癉疼。皆脾家之證。與肺無干焉。得有咳嗽乎。可知濕之一氣。旣非肺臟之病。又非秋令所主。其非秋傷。於濕冬生。咳嗽之謂矣。若感燥氣。則無不咳。何也。以肺爲燥金。秋爲燥令。二燥相合。肺液日耗。至冬。外寒驟加。水冰地裂。風燥益甚。燥極化火。火必剋金。欲

釋經所以明道而濟世也若臆見穿鑿聚訟紛紛反晦經旨是爲害道而惑世矣今引經證經疑義自易辨析而至理顯明庶可羽翼軒岐之道善讀書者自具慧眼蓋

求不咳得乎此所以應言秋傷於燥冬生咳嗽理勢之所必然者經之訛誤顯然而喻氏卓識非同臆見胡可輕訾哉又考生氣通天論曰秋傷於濕上逆而咳發爲痿厥此濕字疑亦燥字之訛蓋痿證之因不一其因於燥者屬肺因於濕者屬脾今言上逆而咳明是肺病燥邪不應言傷於濕非敢臆度以經證經其理自明按本論之前曰因於濕首如裹濕熱不攘大筋軟短小筋弛長軟短爲拘弛長爲痿此論痿之

因於濕者、以濕蒙清陽、頭目昏重、如被裹之狀、濕淫筋脈、則軟短弛長、爲拘爲痿、濕屬於脾、與肺無干、故不咳也、又按痿論曰、五臟因肺熱葉焦、發爲痿躯、此論痿之因於燥者、夫肺熱而至葉焦、其燥極矣、必致於咳、經不言咳、蓋省文、以專論痿故也、昔賢謂有聲無痰名咳、可見咳者、燥氣也、由是觀之、通天論言上逆而咳、發爲痿厥者、與此條之肺熱葉焦、發爲痿躩、豈非同爲肺臟之燥病乎、若果傷濕、則如前條所云、


爲筋病之癆而無咳逆可知矣。況秋爲燥令其濕字之訛更可見也。茲附及以質高明何如。又有吳門薛生白先生節張氏類經爲醫經原旨頗有正誤之處。惟言靈素之文似秦漢人所作中有以酒爲漿之語而儀狄造酒在大禹時可知非軒岐之書也。余按此說雖爲高見但讀書當信其理不可泥其文上古結繩而治刻竹爲書流傳典誥義奧字奇必經後人翻繙編輯而潤色之或有後人評註贊翼攬混於中則必然如是。

一語爲讀書要法

贊語確切

多不類之處。若謂非軒岐之書，斷不可也。試觀其論陰陽五行生化之道，八風六氣疾病之變，臟腑經脈腧穴之詳，針砭藥餌治療之法，以及天時地理、風土人情，莫不詳盡而明其至理。真所謂造化生心，宇宙在手者也。非天生神聖，其孰能之？夫理本也，文末也。安可泥其末而昧其本哉？知道者或不以余言爲河漢乎。

漢乎。



論景岳書

是稿甫就有同道者見之，纔寓目，卽勃然大怒曰。
才學如景岳，前古罕有，後世無及者。誠醫門之柱
石，子何人而敢妄議？有頃，余徐謂之曰：君少安無
躁，試細閱終篇，如果余言爲妄，不妨一一指駁。余
最虛心，不敢自負。若承指示至理，必當終身師事
於君。乃翻閱終篇，不發一語，逡巡而去，倘蒙
當世明賢指余疵謬而教誨之，誠斯道之幸，不獨

余之幸也

竊觀景岳先生才宏學博，平生著作數十萬言。如傳忠錄中，發明頗多。有功醫學，惜乎自矜博洽，少反約之功率。憑臆見逞，筆武斷，不覺毫釐千里之差。雖懷濟世之心，不免功過相半。跡其醫易大寶論等篇，皆似是而非之說。全書之病，實原於此。以至理未明，故不識陰陽六氣變化。人生稟賦源流，不識六氣之變，故論外邪證治，不切於理。而偏涉於補，不明稟賦源

固執一隅之見不悟全經之理乃至毫釐千里之失蓋詳而不精雖博而不知返約之道自負自用則涉於偏曲不自覺其非而反以人爲非也

流故論先天後天皆錯而內傷證治偏執扶陽雖有發明之處不過內經一節之旨其陰悖經義者實多余故謂其功過相半也特以議論風生滔滔不絕淺學讀之目眩心驚無不歎服奉爲圭臬且如景岳之論虛損猶有似損非損之辨戒勿誤補乃今之誦景岳者不分內傷外感但云補正即可去邪遺人殃禍又爲景岳之罪人也猥余淺陋何敢妄議先輩因見流弊日深莫可底止略舉數則以表之俾誦景岳者

取其長而舍其短，則其道益彰，而流澤無盡。自亦先生濟世之本懷也。卽如其論瘟疫云：

真陰外越之苟亦殊不可解

經曰：冬傷於寒，春必病溫。是溫病卽傷寒也。然傷寒有四時不同，如冬感寒邪而卽病者，爲眞傷寒。其有寒毒內侵，而未至卽病者，必待春溫氣動，真陰外越，再觸寒邪，其病則發。故至春犯寒，則發爲溫病。至夏犯寒，則發爲熱病。亦猶傷氣者，遇氣則病。傷食者，遇食則發。其義一也。

夫冬傷於寒、春必病溫。此言伏邪內發、與瘟疫之由時氣穢惡、譟成者迥異。余於溫暑提綱分析已明、豈可混論。其伏邪化熱、乘春夏陽升、自然病發、豈待感寒而後發哉。且夏令焉有如冬之寒氣乎、乃比之以傷氣傷食、不切於理。且未知六氣變化之道也。

又云、瘟疫本卽傷寒、無非外邪之病、但染時氣、而病無少長、率相似者、是卽瘟疫之謂。

古人所以各別其名者、因其邪異病殊治法不同、誤則殺人。今
嘗、瘟疫本卽傷寒無非外邪、反教人不必細分而混治之、是授
人以殺人之真也可。

既名傷寒、則非瘟疫、雖同爲外邪、有陰陽六氣之分、氣殊病異、治法迥別、若時氣者、春風夏暑秋燥冬寒、暑病風病、燥邪寒邪、各有本名、豈可概指爲瘟疫、使牽泥誤治、害難言盡。

又曰、傷寒、瘟疫、俱外侮之證、惟內實者能拒之、卽有所感、而邪不勝正、雖病無害、最畏者、惟內虛之人、正不勝邪、邪必乘虛深入、害莫大矣、且今人虛弱者多、強實者少、設遇挾虛傷寒、而不知速救根本、則百無年。

一生故傷寒書曰陽證得陰脈者死正以陰脈卽虛證也

邪有陰陽清濁之殊
病有表裏淺深之異
不辨而混治無不殺人矣

傷寒邪在軀壳虛者原有補託散邪之法然仲聖辨析已極精詳毋庸再贅今云傷寒瘟疫俱屬外侮而不思瘟疫邪結膜原補之則殺人矣奈何混而不別乎

又曰此欲辨之惟脈爲主脈見微弱浮空舉按無力者卽是虛證最不易解最不宜攻然治虛之法須察

虛實之微甚、若半虛者、必用補爲主、而兼散其邪、若大虛者、則全然不可治邪、而單顧其本、元氣一勝、邪將不攻自潰、

見世俗之誤服補藥
而死者多矣、醫者不
悟其故、死者莫知其
由、蓋亦命也、傷哉

凡六氣外邪之病、其脈有可憑不可憑者、即如暑濕、瘟疫等證、氣血爲濁邪、壅蔽脈道、不清或濡軟、或芤滯、鼓動無力、若認爲虛而用補、使邪與氣血膠結、則輕病致重、重病必死矣、

又曰、凡治傷寒瘟疫、宜溫補者、爲其寒邪凝滯、陽不

勝陰非溫不能行、非溫不能復也。

風寒爲輕清陰邪從表而入由淺入深瘟疫係穢濁熱邪隨氣吸入著於膜原中道膜原正當胃口若投補藥封裹其邪而無出路立變悶病等證而死故傷寒初起誤補其害尚小虛者且須助中氣以托邪豈可不細辨而混治以

竟將傷寒瘟疫同作一病而用補法無怪世俗之不分邪正但云補正即可去邪也卽此數則觀之可知景岳先生不明六氣變化之理辨證論治豈能善哉不識六氣變化由不明陰陽至理故也卽如醫易一篇中云、

神莫神於易、易莫易於醫、欲該醫易、理只陰陽、故天下之萬聲出於一闢、天下之萬數出於一耦、

殺人乎

醫門棒喝

卷三

司馬文正公集

三

奇天下之萬理出於一動一靜天下之萬象出於一方一圓又曰天地形也其交也以乾坤乾坤不用其交也以坎離坎離之道曰陰曰陽而盡之

按此言天下事物之理不出陰陽則陰陽二氣固不可偏重而偏舉也乃下文忽然流於偏見而曰合而言之則陰以陽爲主而天地之大德曰生夫生也者陽也奇也一也丹也易有萬象而欲以一字統之者曰陽而已矣生死事大而欲以一字蔽之者亦

曰陽而已矣。

先生總要一心重陽，故偏從陽邊說去，不知毫釐千里之差，夫致中和天地位焉，萬物育焉，天地之大德曰生者，得中和之道也，中和者，陰陽兩平，不偏不倚，故易曰一陰一陽之爲道，若是一陰二陽，一陽二陰，皆偏倚一邊，失中和而非道矣，今曰生者，陰陽之父母也，若資生惟陽而無須乎陰，則但

妙語

一
以體而言爲理以用
而言爲道用廣而體
微也道者生化之始
兆於未形之先故爲
形而上器者成功之
終止於形質之象故
爲形而下
確然

言天之大德曰生可矣何必曰地乎夫萬物之形
莫不由陰陽五行之氣以成當形未成以先要必
有所以成形之理理在形先幽深玄遠莫可端倪
名之曰道故曰形而上者謂之道也氣化成形各
得其所賦之理以爲物若材之成器故曰形而下
者謂之器也易者表陰陽生成變化之象以明所
以然之道則是統易者道而已矣若曰統易者惟
陽是不揣其本反乖經義流於偏執也所以軒岐

之論陰陽也、千變萬化、無不歸於中和、此醫經與易經用雖不同、而同出陰陽太極之源、可謂之醫卽易、易卽醫也、若不明其旨、而牽強穿鑿、則反悖經失道矣、生死事大、亦豈外乎道哉、

又曰、雖曰陽爲陰偶、而乾陽健運、陰爲陽基、而坤靜常寧、然坤之所以得寧者、何莫非乾陽之所爲、何以見之故曰、如艮其止、止是靜、所以止之便是動、難解

陽動陰靜、自然之性也、艮卦、陽自下升、極上而止、

有止其所而不動之象、此戒人妄動、言當如艮卦
之止靜也、爲因吉凶悔吝生乎動吉、一而已、故君
子戒動、取法乎艮、今云所以止之便是動、不知何
解、

是以陰性雖狡、坤道柔順未聞其狡未嘗不聽命乎
陽、而因其強弱、以爲進退也、所以元貫四德、春貫四
時、而天地之道、陽常盈、陰常虧、以爲萬物生生之本、
此先天造化之自然也、

陽倡陰隨、陽施陰受、陽生陰長、陽殺陰藏、此陰陽體用、相資相成、出於自然、良由太極之一動一靜、二氣流行、進退升降、自有次序、而分春夏秋冬、以成造化之功、元雖首列、而乾之元陽實孕乎坤之至陰、故春雖首季、而春之發生實根於冬之歸藏、若無歸藏、但有生發、其氣不早竭乎、如以春陽爲重、冬陰爲輕、何異見子而忘母、非爲知道矣、天地中人以上可以語上、也中人以下不可以語上、也不知道而妄

意揣度流於邪僻而不自知其害因而遺害於世非中人以上者誰能覺其害而辨其非哉

虧則日積月累盈必更盈虧必更虧陰氣早經偏環勢有緩急故有六氣變化主客參差而致災病然其進退節候自有一定故可測識其變若謂因強弱以爲進退則强者進多弱者退多必雜亂無序焉能分四季六氣之節候哉可見無強弱之異也

惟是陽如君子陰如小人君子則光明正大獨立不

倚而留之難、小人則乘釁伺隙、無所不爲、而進之易、安得春光長不去、君子長不死、惜乎哉、陽盛必變、逝者如斯。

陽若長在不退、譬如煮飯、熟不退火、成焦炭矣、所以成功者退、一定之理、若但有春而無秋、萬物何以成實乎、今願陽常留、是但貪其生、不願其成也、貪生不得、反以戕生、此後世之妄用桂附、冀其助陽延生、反致傷生者、皆出於此言、迷者至死不悟、

可慨也已

故曰、日中則昃、月盈則虧、亦象夫陽一陰二、反覺陰多於陽、

日昃月虧、則陰陽皆有不足之時矣、何以見陰多於陽乎、且上言陽常盈、陰常虧、爲先天造化、今又忽覺陰多於陽、卻從何處覺來、豈先天造化、又不足爲憑乎、若以奇象爲一、耦象爲二、遂謂陰多於陽、則奇卽乾陽、乾爲天、耦卽坤陰、坤爲地、是地果

日相矛盾、真爲可笑

多於天乎，可發一笑。

所以治世少而亂世多，君子少而小人多，期頤少而夭折多。此後天人欲之日滋也。

治少亂多，君子少，小人多，壽少夭多，皆由人欲日滋。人欲日滋，卻因陰多陽少，所以必須桂附助陽，使陽多陰少，則人欲少，而壽多夭少。君子多而小人少，治世多而亂世少矣，可發一笑。

是以持滿捧盈，君子懼之，故聖人作易，至於消長之

際淑慝之分則未嘗不致其扶陽抑陰之意

消長淑慝三句、朱子解坤卦爻辭爲治世之術而言、非陰陽之理、固有淑慝而當扶抑也、聖人作易、有象無辭、扶抑之意安在哉、若謂人身陰多陽少、必當扶抑、始能生存、則人稟天地陰陽之氣而生、必當扶抑、始能生存、則人稟天地陰陽之氣而生、天人非二理也、天地之陰陽、固生化不息、誰爲扶抑而能然耶、何不思之甚乎、

非故惡夫陰也、亦畏其敗陽德、而戕伐乎乾坤之生

由不識天人合一之理、則見紛紛聚訟、不休而卒無定論、使後學各立門戶、將聖道決裂、無有痛哉

意耳

乾爲陽、坤爲陰、陰敗陽德、乃又自戕其坤陰之生
意乎、

以故一陰之生、譬如一賊、奇談夏至一陰生也、履霜堅

冰至貴在謹乎微、此誠醫學之綱領、生命之樞機也、

一味助陽恐樞機偏絕奈何是以易之爲書、一言一字、皆藏醫學

之指南、一象一爻、咸寓尊生之心鑑、雖不言醫而義
盡其中矣、以扶陽抑陰爲醫學綱領故義盡其中又曰易天地之易誠

難易身心之易還易、不知天地焉識身心何有難易、豈不可變理陰陽、扶陽抑陰、卽謂之變理故以易之變化參乎醫、則有象莫非

醫、醫盡回天之造化、以醫之運用贊乎易、則一身都是易、易真系我之安危、故曰、易具醫之理、醫得易之用

此數語教學醫者、走入黑暗窟中、摸索一生、不知頭南頭北、未見一點光明、於是歎景岳先生道高、非後學能領其旨、或有見解者、將卦象爻辭寫在

之每處人者何
卷之

藥方上、自謂深明醫易、持以倣物、嗟乎、學醫人廢、
豈不信哉、

甚矣、先生昧於易也、昧於易斯昧於醫矣、昔人言、
學道最怕理障、理障者、幽微難明、似理非理、認其、
影而昧其體也、愈聰明則障愈重、蓋由博而不約、
詳而不精、自負聰明博洽、終身不悟其非也、欲論、
陰陽變化之理、千百言足以盡之、乃泛騷廣喻、葛、
蔓至六千言之多、俗學見之、驚心動魄、歎爲希有、
而夫子所以每欲無、

其害偏因聰明所致
聰明無所用之莫暗
昧者反可學道平鳴

言中求之聰明暗昧
均不相關也

其實只有陽少陰多、扶陽抑陰八字而已、扶陽抑陰、內經論病變治法之一端、今以爲醫學綱領、名爲尊經、實則悖經、若粗淺之文、是非易辨、害道尙輕、今以博洽之才、出之以韓蘇之筆、引經據典、浩瀚其文、雖精通文墨者、讀之莫不深信歎服、此吾道所以爲甚也、楊墨之道不息、孔子之道不彰、爲其似是而非、紫之亂朱也、若景岳者、豈不爲醫門之楊墨乎、余之不避罪愆而爲是言也、實痛夫軒

所以學道當於無言
中求之

可知扶陽抑陰不過
儒者取喻治世之法
與醫理無關若致中
和位天地育萬物者

岐之道將墜於地、非敢自鳴以爭勝也、知我罪我、其在斯乎、夫醫者必宗軒岐、軒岐論陰陽常變之理、原與羲聖一揆、但羲聖止有卦象以表理、並無文字語言、儒者取象以陰陽進退消長喻世道治亂盛衰、而治世之術莫先於進賢退不肖、乃又以陽喻君子、陰喻小人、故曰扶陽抑陰、設或當時以陰喻君子、陽喻小人、則勢必曰扶陰抑陽矣、乃不明此義、而以喻言會作實理、已失易經本旨而更

則醫理儒理俱在其
中

以扶陽抑陰爲醫學綱領、非但認影昧體、不啻千
里之差、尤恐人不之信、多方引證以實其說、盡皆
似理非理、不虞流弊之害、積重難返、此所以不患
無書、而患多書也、旣昧陰陽至理、故亦不識人生
稟賦源流、先天後天之辨也、卽如

大寶論中有云、內經於陰陽之理、惟恐人之不明、而
切切諄諄、言之再四、奈何後學、猶未能明、皆爲似是而非之說
以障余請先言其二、而後言其一、夫二者、陰也、後天

之形也

將耦作二已爲非理後天之形豈止孤陰而無陽乎

一者陽也先天之

氣也

將奇作一已爲謬矣先天之氣豈止孤陽而無陰乎

神由氣化而氣本乎

天所以生發吾身者

卽真陽之氣也

形以精成而精生於氣所

吾身者卽真陽之氣其生

神之氣豈爲假陽之氣耶

以成立吾身者卽真陰之氣也

成立吾身者卽真陰之氣生精之氣又爲

假陰之氣耶

由其博而不約詳而不
不精昧正路而涉旁
門自以爲是終身不

悟其非也

辭簡理明

離顛倒也、豈不聞易有太極而生兩儀、兩儀卽天地、卦象爲乾坤、乾坤卽陰陽、故又言太極動而生陽、靜而生陰也、當天地未分以先、渾然之體名太極、故稱先天者、天地旣分以後、生化萬物、故名後天、是故先天者、陰陽未判也、後天者、陰陽已分也、男女構精妙合而凝、始成一珠、有氣無質、卽太極渾然之體、故名先天、旣而分形、象如兩儀、名爲陰陽、遂生兩腎、百骸次第而成、均名後天也、夫陽卽乾、

聖經精蘊表而出之

陰卽坤今以陽爲先天陰爲後天則是以乾爲先
天坤爲後天矣豈非大錯耶乾爲天坤爲地先字
之義安在哉太極者渾然一氣所以能生陰陽五
行萬物者蓋有主宰存乎其先卽易所謂妙萬物
之神也若神由氣化焉能主宰太極乎陰陽不測
之謂神卽人之靈明也亦名爲性今言神由氣化
而氣本乎天則是先有氣而後有神也然則中庸
顯然悖理無可遁逃

偏執景岳自以爲是
者讀之當惕然汗下

見先生本未明易乃強不知以爲知耳既不自悟
而猶肆詆前賢貽誤後學嗚呼其過深矣

陽化氣陰成形兩句
雖出內經殊不知經
乃申明陽生陰長二
句之旨經中明言陰
者有三義焉一曰形氣之辨二曰寒熱之辨三曰水
火之辨夫形氣者陽化氣陰成形是形本屬陰而凡
中陽中有陰則
形雖陰成中必有陽
氣雖陽化中必有陰
如噓氣成水共理顯
盡滅形固存而氣則去此以陽脫在前而陰畱在後
然今曰形本屬陰又

曰陰留在後竟解作

獨陰已兼經旨又言

陰多於陽則更謬矣

且經下文言形歸氣

又言氣生形可見形

氣本爲一物不能分

析者也

非陰多於陽乎。

夫天以陰陽五行化生萬物氣以成形則凡有形之物莫非陰陽五行之氣所成豈可以形屬於陰乎蓋氣凝而成質形者氣之結也質消還爲氣氣者形之通也是故形氣本爲一物總由陰陽五行凝結而成所以形毀則氣散而死如殺傷之類也氣消則形敗而死如老病之類也夫一靈主於太極太極生陰陽五行以成形則謂之生五行陰陽

故內經言氣能生形
形化則仍歸於氣其
中妙理固非俗學所
能測則不免妄意揣
度而已

消散而太極毀則靈去而謂之死消散者陰陽五
行之清氣遺留者陰陽五行之濁滓也濁滓亦終
歸於盡而隨氣化矣既不明稟賦源流先天後天
之理遂有似理非理之說以證陰多陽少之僻見
所以惑人者深也

二曰寒熱者熱爲陽寒爲陰春夏之暖爲陽秋冬之
冷爲陰若言陰多陽少莫非當長夏之暑萬國如爐
秋冬多於春夏乎

則不盛及乎一夕風霜卽僵枯遍野冬蟲夏草冷反活而變蟲熱反
死而變草又何也不明陰陽至理安可以淺見臆度乎是熱能生物而過熱者
惟病南方中熱邪而暴死者矣常多於北方中寒者矣寒無生意而過寒則伐
盡然則熱無傷是何言與內經論熱病致死常多於他病豈經言非乎而寒可
畏非寒強於熱乎

是則偏之爲害此道之所以不明也

內經列六氣火居其二寒風濕燥各居其一今言
寒強於熱是顛悖經旨也且言熱無傷寒可畏果
如此說則仲景之白虎黃芩瀉心承氣等湯皆爲

無用、而天下之藥、但須姜桂附子足矣、世俗之見
熱病、不用涼藥、非寒、而妄投桂附致死者、皆出於
此言也。

三曰、水火者、水爲陰、火爲陽也、造化之權、全在水火、
而水火之象有四、則日爲太陽、火爲少陽、水爲太陰、
月爲少陰、此四象之真形、而人所未達也、有聞而異
之者曰、月本太陰、火豈少陽、何據云然、曰、陽主乎外、
陰主乎內、此陰陽之定位也、陽中無太陰、陰中無太

太陽此以生化而言
謂陽生陰老生少也

若陰陽匹耦則太陽

配太陰如日月之在
天也少陰配少陽如

水火之在地也故乾

坤爻而變坎離猶日
月之能生水火也不
明至理則顛倒錯亂
悖經失道矣

陽此陰陽之專主也日麗乎天此陽中之陽也非太
陽乎月之在天陽中之陰也非少陰乎水行於地陰
中之陰也非太陰乎火之在地陰中之陽也非少陽
乎

陰陽之道互根互用變化無方今日專主曰定位
變成死物矣然用雖變化而理則一定如坤與乾
配離與坎配則日與月配如乾坤故稱太陽太陰
水與火配如坎離故稱少陰少陽今反以月爲少

陰則是以坤配離也、不明陰陽卦象、猶欲談易理、
乎、且火從日生、故稱少陽、水從月生、乃反稱太陰、
是又以子爲母矣、何顛倒若是耶、

此等大義、誠丹溪所未知、杜撰創論誰人能知故引日月盈虧

以證虛實、亦焉知水大於日、獨不慮陽之不足、陰之
太過乎、

丹溪言陽常有餘、原爲一偏淺見、而非至理、今以
水大於日爲陽之不足、又何異村夫村婦之見哉、

客曰、陰陽太少之說、固若有理、昧者必惑至於水大於日、

必昧者

至於水大於日

擬人曰、是更有妙理存焉、沉迷魔界而不悟、反謂自得妙理、卽所謂理障也

沉迷魔界而不悟反謂自得妙理卽所謂理障也

夫陰陽之性，太者氣剛，故日不可滅。既氣剛不可滅，何慮其不足乎？

水不可竭，此日爲火之本，水爲月之根也。月中可取水則水從

月生今反言水是月之根
豈父從子生乎可發一笑少者氣柔故火有時而息

月有時而缺、此火是日之餘、月是水之餘也、

發火息火皆由人。豈關於火。以火有時息而爲柔。

則晚間日落亦如火息又安得爲剛真如癡人說
夢也火從日生故火是日之餘水從月生何故反
以月爲水之餘豈非自語顛倒乎○或曰靈樞陰
陽繫日月篇云月生於水故景岳以水爲月之根
原有所本豈可非乎答曰景岳之謬正由不明經
旨之故按本篇言人身腰以上爲天腰以下爲地
天爲陽地爲陰故足之十二經脈以應十二月月
生於水故在下者爲陰手之十指以應十日日主

火故在上者爲陽此以人身比天地陰陽之象非論陰陽生化之理也其言月生於水之生字必是主字之誤觀下文日主火句其理顯然可見且經中明言天爲陽地爲陰日爲陽月爲陰又言水火者陰陽之徵兆也蓋天地日月周流不息爲陰陽之體水火生化爲陰陽之用而用從體出故日中可取火月中可取水此其明徵也所以水火爲陰陽之徵兆若謂月從水生試問水中果可取月否

乎，何不思之甚耶？是故不明至理者，斷不可解經。正恐其不識全經之理，但執一二死句，穿鑿附會，遂謂本於經語，乖僻自用，而不知害道之深也。

惟其不滅，方爲真火，而時作時止者，豈卽元陽，故惟真陽之火，乃能生物，未聞有以烘炙而生物者，是安可以火喻日也？客曰：若如此言，則水誠太陰矣。可惜一般

解見

上言火在於地爲少陽，世間萬物，豈非皆從地生

自相矛盾也

問得甚妙

乎。則時作時止之火，固已能生物者。今又云，時作時止者，非元陽，惟真陽之火，乃能生物。然其生物真陽之火，又作何狀耶？得非謂太陽之火乎？試問從太陽取出之火，與擊石取出之火，同一火耶？有不同耶？請先生細細分之。何者爲真陽之火，何者爲假陽之火？奈何沉迷魔界，反謂自悟妙理，誠可憫也！地出之火，可用烘炙，從太陽取出之火，不可烘炙乎？烘炙不能生物，如以枯木曬於日下，能生

枝葉否乎、况如雞卵之類、人有用火溫養而出雛者、是烘炙亦有能生物者也、而不思天地日月水火、皆陰陽之形氣、不明至理、徒執形象之末、妄論有餘不足、誰假誰真、無異癡人說夢也、

又曰、陽主生、陰主殺、經言陽殺陰藏、是陽又主殺矣、則必扶陰抑陽方為善乎、凡陽氣不充、則生意不廣、而況於無陽乎、陽來則生、陽去則死矣、試以太陽證之、可得其象、夫日行南陸、在時爲冬、斯時也、非無日也、第稍遠耳、便見嚴寒難禦、

之若此、萬物彫零之若此、然則天地之和者、惟此日也、萬物之生者、亦惟此日也、設無此日、豈非六合盡冰壺、乾坤皆地獄乎、人是小乾坤、得陽則生、失陽則死、陽衰者、亡陽之漸也、恃强者、致衰之兆也、可不畏哉、

冬則大寒、凝冰、夏則大熱如火、南陸北陸、相去無幾、何寒熱不同之甚哉、且如六月之夜、日沉九淵、豈不更遠、何以不似冬之嚴寒、而猶如火爐耶、殊

不知塞乎六合者惟陰陽二氣而已日月水火皆

陰陽之形象未可泥象執形而昧其理也夫寒暑

往來者陰陽升降進退也但一日則有一日之升

降一歲則有一歲之升降自子時陽升至巳而極

午時陰升至亥而極故內經曰日中而陽隴同隆爲

重陽陽極陰生日西而陽衰陽降陰出日入陽盡而陰受氣

矣陽入陰升夜半而陰隴爲重陰陰極陽生夜半後陰衰陰

平旦陰盡而陽受氣矣陰入陽升此一日之升降也

世皆視為尋常不知

或曰、此內經論人身營衛之氣升降、非論天地之氣也。答曰、人稟天地之氣以生、與天地同一橐籥。知天地之氣、即可知人身之氣。知人身之氣、正可驗天地之氣也。景岳未明至理、且言人是小乾坤、若岐視天人、則不知三才一貫之大道矣。又如子月冬至、一陽升於九淵之下、爲復卦。至己月而陽極、爲乾卦。午月夏至、一陰下升、爲姤卦。至亥月而陰極、爲坤卦。故夏至後、陰氣自下而升、則井中甚

中有至理

飛走動植莫不由二氣相交生化而成是故陰陽貴平稍有偏駁則災病立見當其偏時或陰或陽原無一定醫者補偏救弊惟求其平而止豈可

冷、陽氣自上而降、故地上甚熱、冬至後、陽氣自下而升、則井中甚暖、陰氣自上而降、故地上甚寒、此一歲之升降也、蓋二氣升降卽陰陽相交、其所以然者、陰陽互根於太極、太極動靜循環無端、故二氣往來、相交不已、其輕清者、爲陰陽之氣、重濁者、爲陰陽之滓、輕清包外、而上浮名天、重濁凝中、而下止名地、其氣既包地外、又貫地中、太極動靜有序、故氣升降有序、其外包之氣、又多轉旋、與地中常、故氣升降有序、其外包之氣、又多轉旋、與地中

固執一邊而曰扶陽
抑陰則反使平者偏
矣醫云乎哉

旋轉迴環升降進退
雖變化萬端實則一
元之運動而已動則

變化動極而靜則復
其常靜極復動循環
無間故萬物生化不

升降之氣參差變異故內經以升降者爲主氣轉
旋者爲客氣以客加主則變化出矣又言日月爲
陰陽之精氣水火爲陰陽之徵兆可知日月水火
皆陰陽之形象也但日月隨轉旋之氣行地外水
火隨升降之氣行地中迴環往復無非渾元太極
之一氣而已是故積陽爲天冬至後陽漸升則天
體漸廣而日行地上漸久晝漸長夜漸短夏至後
陽漸降則反是也春秋二分陰陽適平故日行自

息也

東而西、則晝夜均、冬夏二至、陰陽極至、故日偏行、南北、而晝夜有長短矣、皆爲轉旋升降、互交互變、歲序旣周、仍復其常、二氣相交不已、則生化之道不息、故主氣升降有常、則春溫夏熱、秋涼冬寒、序有一定、其或春夏忽涼、秋冬反熱者、客氣加臨變化也、一歲之常變如是、則一日之涼燠陰晴亦如是、推之一時一刻皆然、則陰陽變化之道、安可窮盡哉、夫升降之氣行地中、如人身之營行脈中也、

可知人身之氣知人
身之氣正可驗天地
之氣也

水火如營中之血氣也轉旋之氣行地外如人身
之衛行脈外也日月如衛外之陰陽也故人衛氣
晝行於陽應日之升也夜行於陰應日之沉也天
地陰陽一日之升降如人之呼吸也一歲之升降
如營衛之循環也良由天地人身同出陰陽太極
之造化故內經論天人合一之理莫不互舉互證
不正分析者也明乎此則天地陰陽不可偏偏則
災害立至人身陰陽有偏則病生矣豈可以扶陽

如是明白開導若猶
執迷自是真爲下愚
不移者也

抑陰爲醫學綱領、反使其偏勝乎、景岳旣註內經、
又談易理、何故不遵經義、乃謂日遠天寒、以證陽
少陰多之偏見、試思日之遠近、相去幾何、而寒熱
懸殊、乃至若是乎、且旣日遠爲寒、其井中反熱何
也、由是觀之、自可灼見其非矣、蓋陰陽變化、莫測
其端、現象於日月水火、聖人觀象知理、因日以定
月、因月以定歲、因歲以測升降之氣、而分節序、因
日月運行有遲速、乃勾以大建小建、而定期望、節

故不知天時不知地
一元運動故非二體

氣遷流與日月又有參差則以小建之餘積爲閏月其歲時節序始能相合而循環無愆也是以日月隨轉旋之氣而行寒熱隨升降之氣而變陰陽升降之極則寒熱若冰炭之殊此一歲之寒熱因乾坤大氣之升降也晝夜有溫涼因日之偏正出沒也乾坤大氣若水之進退日月流行如瀾之迴環源流本末非二體也但升降之氣有常轉旋之氣多變東南木火之方則多熱西北金水之方則

理不識人生真賦源
流風土氣化變異不
可以爲醫也

二句直貫篇首有銅
山西崩洛鑾東應之
妙滔滔千百餘言層
波疊浪義理貫串而
一句收煞有橫江截
流之勢真大手筆也
長於文者未必精於

多寒中州以北寒熱有常者得升降之氣多也梅
嶺以南溫涼靡定者得轉旋之氣多也以是見天
時地理氣化民風之錯雜萬殊者不出陰陽之變
化而二氣流行豈非充塞乎六合哉不明乎此而
泥象執形以昧至理安可論陰陽乎景岳如不明
經旨則不當註經若明經旨而故爲僻說以愚後
學則尤非理世有遵信其說者惑之甚矣其後篇
真陰論亦言陽以陰爲根陰旣爲陽之根豈可反

理深於理者辭或不能達三美兼備必得之也

重枝葉而輕根本乎、則扶陽抑陰之說、又見其自相矛盾也、總而言之、陰陽互根於太極、必不可稍偏。偏勝則偏絕、而太極亦毀矣。故易言一陰一陽之爲道、內經言陰平陽秘、精神乃治。夫言平者、不使偏勝也。秘者、勿使發越也。以陽性動而發泄、發泄太過、真元傷耗、故特用一秘字。嗚呼、可知聖人之意深矣。此之謂致中和、位天地、育萬物也。今言扶陽、是更助其發泄也。抑陰、則不使其平和也。非

但不解聖人深意而反顯悖經旨矣豈不爲醫門

之異端後學之魔障哉醫爲性命所系雖明中和

之道而臨證之時猶必細察天地六氣之變風土

剛柔之殊人稟強弱之異外感內傷之別權衡補

瀉之宜必使藥病相當而無一毫偏執庶幾求合

軒岐仲聖之道此之謂醫學綱領嗟乎豈固陋剛

慎者所能領會哉

或問仲景非醫門之聖與答曰猶儒門之孔子豈不

天資學力兼全猶必
虛心謹慎如是而稱

司命廣武寡過矣乎

以爲聖乎、然則孟子願學孔子、而實傳孔子之道、若景岳生平師範仲景、故號景岳、以表仰慕之意、仲景曰、陰證見陽脈者生、陽證見陰脈者死、豈非以陽爲重乎、故景岳以扶陽抑陰爲主、猶孟子之願學孔子也、今子以景岳爲醫門異端、得非謗之太甚乎、答曰、孟子學孔子、實傳孔子之道、若景岳雖慕仲景、實未知仲景之道、或反有以悖之者、豈仲景之徒哉、曰、何以見之、答曰、仲景辨傷寒脈證之陰陽、以決生死脈

太浮數動滑爲陽、沉濇弱弦微爲陰、陰證者、邪在陰經也、陽脈者、正氣未虧也、陽證者、邪在陽經也、陰脈者、正氣不振也、邪在陰經病爲重、正氣不虧則生、其在陽經者更無虞矣、邪在陽經病爲輕、正氣不振則死、其在陰經者更難治矣、此論邪正勝負以辨吉凶、何嘗有扶陽抑陰之義耶、仲景垂法惟辨脈證溫涼補瀉、隨宜而施、故爲時中之聖、豈同後人一隅之說哉、且景岳言丹溪之左金丸、黃連吳茱、寒熱並用爲

非則仲景之瀉心法，芩連二薑、大黃附子，豈非寒熱並用乎。瀉心所以保金，左金所以平木，名義雖殊，理則一也。乃不敢非仲景而非丹溪，既以左金爲非，安得以瀉心爲是？以仲景稱聖，故不敢非之耳。余故言景岳未知仲景之道，或反有以悖之者，不其然乎？且天下道理，一而已矣。醫理卽易理，儒道卽醫道，惜景岳辨別不眞耳。夫道卽理，理卽道，異名而一體也。在體名理，在用名術，在體名道，在用名權，權卽術，術卽

權異名而一用也。術者應變無方，恰當其可，而不出乎理，不出乎理，所以能恰當也。權者，因事裁制，無不得宜，而仍合乎道，仍合乎道，所以能得宜也。故道理有一定之是非，必辨之精，而後是非見。權術應無窮之變化，必不可執而後用之。靈然必體立，則用行道理，不明權術，豈能施哉？故天下有明其理，而不能善其術者，未有不明其理，而能善其術者；也有明其道，而不能行其權者，未有不明其道，而能行其權者也。故

明體則知其所同達

用則識其所異是故

通儒方能通醫通醫

莫不通儒

曰可與適道未可與權知常易通變難也夫致中和育萬物爲儒者之道卽醫者之道也而和之育之必本乎陰陽造化之理此醫易之所同也故不知儒理不可以談易不解易義豈可輕論陰陽之理乎儒者格致誠正治人心病醫者制度藥石治人身病此權衡之用異也藥石治身身與藥石皆陰陽五行之氣所成故必洞曉天地人身陰陽五行之理而後方能善其術誠正治心心中誠正出於天理之自然故必

克己復其天理之常而後方能行其權是故伊尹放太甲乃行權之一事若執爲儒道綱領豈不大謬乎哉扶陽抑陰爲治病之一法若舉爲醫學綱領豈不大謬乎哉且夫軒岐大旨猶似易明仲景之法實難領會蓋軒岐論陰陽五行病變之理爲道之體然明體而不達用者多矣所謂有明其理而不能善其術者也仲景辨經絡臟腑病邪淺深陰陽虛實參藥性氣味溫涼補瀉以立法窮盡變化仍合軒岐之旨

以三子配仲景爲四
大家之說起則仲景
之道遂晦矣傷哉

爲道之用、用不可執、應變無方、故難領會。景岳未明軒岐之道體、焉能達仲景之用、所謂未有不明其理、而能善其術者也。由是觀之、則景岳非仲景之徒也。千百年來、繼仲聖者、實難其人。日嘗聞河間論溫熱、丹溪主滋陰、東垣扶脾胃、皆補仲景所未備、故合爲四大家、則是繼仲聖者矣。答曰：此後世之膚見、可哂也。夫仲景之書、無法不備、其旨合乎軒岐、而窮變化、爲萬世規則、與聖道一脈相承。書雖殘缺、理法自全。

豈待後人補之哉。若三子雖有發明，各舉一隅以立言，執之則偏，皆未達中和之道，尚不足爲仲景之徒顧並而尊之，不倫極矣。曰：然則子反以近時葉氏爲傳仲聖之心印，豈真賢於三子乎？得毋阿其所好耶？答曰：道者天下古今之公器，余豈得而私之？朱子敘道統，以濂溪周子接孟子，豈漢唐之盛，竟無人物可取乎？正如孔門三千之多，自顏子早逝後，傳心印者惟曾子一人，非箇中人誰能領畧此意也？葉氏辨證

設方無不參乎陰陽五行之理、則合軒岐之道矣。取古方之善者、因宜裁制、變化隨時、歸於恰當、則達仲景之用矣。明體達用、庶幾可傳心印乎。自非諸子舉一隅之見、可同論也。然非箇中人、則又難言耳。曰：然則三子之說、執之則偏、而景岳亦有一節之長、何故？子獨以景岳爲異端乎？答曰：三子一隅之說易辨、故昔人謂其補古未備、而非全書。其偏易辨、則惑人少、而害道輕。其發明處、則有功焉。若景岳者、以東垣論

補同於己、則褒之、劉朱異於己、則貶之、三子本皆各舉內經一節之旨、無所軒輊、景岳偏見而有褒貶、又以道統自任、名爲全書、妄稱典謨、更引易理聖言、曲證其扶陽抑陰、陰多陽少之偏見、強辭雄辯、雖知醫學者、不敢輕議其非、或更稱頌而贊揚之所以惑人深而害道大、余竊窺軒岐之旨、傷俗弊之害、輒不自揣思以補救將來、聊陳其概、非敢以訏爲直也、夫醫家治病、莫不欲其速愈、斷無害人之心、但醫理幽微、

學識難到、則必虛心謹慎、而不剛愎自是、或可寡過。其患病之人、不知醫理、焉能辨別醫之優劣、惟隨聲而趨、人情皆然。古今一轍、世之誦景岳者、不分內傷外感、但云補正即可去邪、偏執已見傷人而不自覺、良由篤信景岳之說、不明至理故也。若見是篇、而能悔悟、痛改舊轍、研究軒岐仲景之旨、歸於中和、庶可補過從前、如不虛懷體察、而剛愎自是、則有心爲惡、力無心之誤、神明猶譬如仁術、其術不精、反以殺人若盡己之、雖無殺人之刀、已蘊殺人之念、則必受報於冥冥中。

學識難到、則必虛心謹慎、而不剛愎自是、或可寡過。其患病之人、不知醫理、焉能辨別醫之優劣、惟隨聲而趨、人情皆然。古今一轍、世之誦景岳者、不分內傷外感、但云補正即可去邪、偏執已見傷人而不自覺、良由篤信景岳之說、不明至理故也。若見是篇、而能悔悟、痛改舊轍、研究軒岐仲景之旨、歸於中和、庶可補過從前、如不虛懷體察、而剛愎自是、則有心爲惡、雖無殺人之刀、已蘊殺人之念、則必受報於冥冥中。

**贊爲仁術其術不精
反以殺人若盡己之力無心之誤神明猶
恕或藉贊名爲謀生**

之具輕忽人命難逃

惡報不如及早改圖

爲善所謂擇術不可

不慎也

也。上天鑒臨可不畏哉。

或曰、嘗見誦景岳者、其門如市、昔人言良醫之門多病人、則其醫之良可知、何有傷人之失乎、答曰、病者若知醫理、則自治矣、何來就醫、不知醫理、豈能辨醫之庸良、一如蛾之赴燈、見光而投斃者斃來者來燈、不自知所以傷蛾、蛾亦不識爲燈所傷、仁者觀之、未有不惻然心動者也、或有外邪得補而暫伏、病似小愈以爲功、不知暗傷而後更重、則歸咎於病、不咎於

說盡弊害可使病者

警醫者慎焉

醫或有病合於藥而幸愈者人皆稱誦不已則醫自信益堅稱誦漸傳則虛名漸盛名盛而赴者益多醫更自負偏執愈深而傷人愈衆必至如蛾赴燈俱在夢夢之中使在天之軒岐仲聖不禁痛哭流涕而長太息此余之不容不辨也乙酉歲余遊吳門遇嘉興汪孝廉平日博覽醫書尤謂景岳辯論勝而篤信之之也此受害而不知所以爲害之深也

卽上所云雖通人不敢議其非而更稱揚所以爲害之深也

兄明府印世樟忽遣人邀余言孝廉病重余診視見其

面黑晦反側不安連呼救命按脈已無舌苔灰黃厚滯乃詢病由其令兄代云本患瘧疾自服補中益氣湯瘧止數日後復發改服景岳何人飲不效又服熟地理陰煎忽沉重如此余曰木因伏暑發瘧邪欲外出得補中益氣邪遂暫伏故旋卽復發更進然地等膩補將邪欬裏膠結一身氣血不行經脈盡閉故無脈而成閼瘻之證急使人挑之血亦不出徧請醫者

似是而非之證最爲
難辨東垣以手心熱
爲內傷手背熱爲外
感僅指風寒外邪而
言而不知暑濕內熱
正似內傷爲因古來
惟以傷寒爲外感重

竟無法可施至晚而卒嗟乎景岳不明六氣陰陽之
理論瘟疫傷寒混作一病有教人用人參熟地理陰
煎等藥凡病必言其虛當補故篤信其說者傷人不
自覺其非若暑濕之證脈濡濇無力頭痛或作或止
倦怠惡食乍寒乍熱小便黃手心熱酷似東垣所論
勞倦內傷既不明六氣外邪證治則必誤補非但害
世或至自戕誦景岳而不究心六氣之病者可爲前
車之鑒矣余於虛損論後有辨內傷外感證治之概

症並不知究六氣之

理而仲景論溫暑客

條甚少必因殘缺散

失而又多混入傷寒

條中以故溫暑等證

誤作內傷者多矣近

賢葉天士先生始詳

謂考覈精詳乃反以古來月借日光之說爲非而不

細辨別厥功大矣而

世俗淺學猶不留意

氣哉

如、

附辨日月體象

朱丹溪嘗言日無虧故陽常有餘月有虧故陰常不足後世偏執其說害與偏從景岳同夫陰陽二氣變化流行互有偏駁之時故有偏陰偏陽之病豈可謂陰陽之理固有偏勝之異哉且日爲陽故有光月爲陰本無光因其借日映照而現光光從日轉則有背面側面故人見有盈虧其月體豈有盈虧哉丹溪不明陰陽至理且亦不識日月體象也而天元歷理一書亦不明日月體象乃云

昔人謂月無光，借日之光以爲光，非也。日月皆爲天之精氣，何一有光而一無光乎？

經曰：日月者，陰陽之精氣也。雖同行於天，其陰陽體象自然不同。陽氣有光，陰精無光，亦一定之理。何以見月必有光乎？

特陰光不勝陽光，故日出而暗，日入而明。若日借光，則晝當並明，何以晦暗？

旣言月自有光，日入而明，則凡有月之時，必當如

日之圓、不應有缺、因其借日顯光、故向日半邊明、
背日半邊暗、遂有圓缺之異、若晝時同行、亦必向
日半邊有白光、背日半邊則無跡、若行度相近、則
日高在上、月低在下、其光向上對日、人在下、故不
見其形、今反言借光晝當並明、何也、如月自體有
光、方能並明於晝、縱不能如日之明、其白光必圓、
今或無跡、或向日半邊有白色、則其本體無光、更
可知矣、

蓋陽精積火故內朗、陰精積水故外瑩、內朗故通體皆明、外瑩故半明半魄、

半明半魄者必謂通體之光不能透澈也、斷非截然中分之半明半暗也、若截然中分、明暗各半、豈非變成死物、必無是理矣、謹按聖人設卦、以火屬離、水屬坎、夫火生於日、水生於月、驗水火之明暗、足知日月之體象也、故昔人按坎離二卦論水火、最爲確當、離卦外陽內陰、故火外明內暗、坎卦外

陰內陽故水外暗內明火之內暗人猶難見若水之內明入水者靡不親見黑夜不見水色則外暗又可知矣蓋陰陽之道互根互交互藏互用日陽而涵陰體月陰而藏陽精故日外明內暗月外暗內明以其中有所藏故陽能生陰陰能生陽而生生不息也月與天同色故人不見其體如以白布一圍置大幅白綢上近覩可辨綢布遠觀則不能辨惟見白色而已月之在天亦如是夜中天象黑

月體亦黑，如缸水置暗室，則不見水色。將燈照之，水光卽現，但光淡不及燈光之紅。月借日光，亦如是。良以水火從月日而生，故相感之理無異也。今反謂火內朗，水外瑩，則將坎離二卦顛倒矣。既非聖人設卦之理，尤可不辨而知爲謬也。

水火陰陽相勝而相濟，故明則相向，魄則相背。日明與月明，必相對而轉，故向背從遠近而增損。於是有上弦下弦，若借光則圓體漸進，不當有弦。有弦者半

體之漸轉也。

此更自相矛盾也。旣言日明與月明必相對而轉，又如何辨其爲自光、爲非借光乎？且云明相向、魄相背、向背從遠近而增損，於是又有上弦下弦果如此說，自必相近則向多增明、相遠則背多損明。如天圓鏡相對，斷無相近而反背多損明之理。然則初三四日從西落，月卽從西現，則甚相近必定向，多應當增明，乃反損明，何也？十五六日從西落，月

從東上則甚相遠必定背多應當損明乃反增明
何也殊不知明相向者正如燈之照水而現光故
向日半邊明背日半邊暗人見其背面則暗見其
側面則半明何故又不當有弦乎自弦而望豈非
圓體漸進乎又言有弦者半體之漸轉也正因借
光故從半體而轉若其自體之光必當常圓何反
謂其非借光耶豈真截然半分明暗各半如死物
乎何不思之甚也夫日月隨轉旋之氣而行如雙

丸隨流水而旋轉、有高低遲速、日陽而氣高行速、
月陰而氣低行遲、乃自然之理、因有高低遲速、故
光從下方相照、人居下一方觀之、必兩丸對分左
右、始能一見其圓光、餘皆見其背面側面、故有晦
朔弦望之異、因其借日顯光、故有背面、若月自體
之光、其丸雖轉、其光自圓、何有背面乎、若其自體
之光有背面、則必截然中分如死物、其半邊之光、
隨自體而轉、不能與日相照不移也、光如照日不

若自體不轉則又無
晦朔弦望之變異可
知其必旋轉也。旋轉
而行與日或近或遠
或高或低故其形漸
變異則其借日之光
映照而然更可曉矣。

移則自體又不能轉矣可知斷非明暗各半之死
物也旣非明暗各半之死物而兩光同轉光又與
日相照不移實同水之對火而有光則仍借日之
光以爲光乃陰陽交感之妙理也卽如日食月食
有幾省見有幾省不見或見食多或見食少此因
地有高下所見卽不同則可知日月本無食偶因
轉旋偏傾之故耳厯家以日食爲臣蔽君明月食
爲臣干君明果爾則見食處爲君所主不見食處

獨非王土乎、可見非至理也、天象變異、垂示炯戒、
感格之事、亦固有之、但不可拘泥以乖至理耳、夫
晦者日月同宮、若初一猶行同道、日高月低、故月
遮日光爲日食、日食必在朔也、旋卽兩丸斜去、故
初三、四日落後、月卽微露其光、漸轉爲上弦而至
望、若兩丸又有傾側、則爲月食、故月食必在望也、
當其偏傾、人見其食、而兩光本無缺也、少時歸度、
則人見如舊、望後兩丸又斜轉去、人見微露黑體、

漸轉爲下弦而至晦、故聖人因日以定月、月轉十二回、則乾坤升降之氣一周、乃爲一歲、乾坤之氣一升一降、卽太極之一動一靜也、

或問兩丸同轉、如水滾球、何以知其然耶、答曰、理固如是、豈難解耶、體圓如球、隨轉旋之氣而行焉、得不轉、試觀流水浮物、凡長方者、始能橫直而行、若四方者、已有旋轉、何況圓物、日月隨氣而行、無異物隨流水而走、天地萬物、同出一氣、故理無二。

致窮理即可格物若必眼見方信則天下事物無限又豈能盡見哉不知隅反更難與言窮理格物矣

在晝則晦在夜則明猶之朔夜星多望夜星少蓋星月皆自有光而精氣厚薄不同有勝有不勝非借之謂也

旣言星月皆自有光而晝晦夜明是謂無日則月光顯也朔夜星多是謂無月則星光顯也然則凡

有月之夜，其光當圓，不當有缺。而朔夜星光全顯，月光有缺，何也？豈非又相矛盾乎？

譬如火在日下，則無光。置暗室，則光滿室。火光豈亦借日乎？

暗中火光滿室，月既自體有光，夜必常圓，更不當有缺矣。夫日中取火，火從日生，小光在大光中，自然不顯。猶父在子，不得自專也。火爲陽，外明內暗，水爲陰，外暗內明。火生於日，置暗室，則明；水生於

月置暗室能明否耶以火比月將陽作陰可乎否耶夫水火生於月日故水火可驗日月之體象是因流溯源爲一定之理今以火比月又以星比月是不明陰陽至理徒以臆見揣度無怪乎將坎離卦理顛倒也

是以月食雖盡而紅光隱隱在上必不盡光自在體轉而向上也若借日爲光食盡則掩盡內映之光何從而得且月無光則星亦無光何以星明不因日之

遠近而變、

月食而光本無缺故有見其不食之地足徵其光非缺也見其食而內映有光更可知其內明外暗之體矣內明外暗非得日照其光不顯又可見陰陽精氣互相交感如磁引鐵之妙也月爲陰精故體黑無光借日之光故隨日轉而有變星乃五行之氣所結其自體有光不隨日轉則光不變矣月是月星是星迥乎不同月無光何故星亦應當無

光耶、何不通若是乎、就如上節所言、星月皆自有一
光、然星光無圓缺、月有圓缺、豈非因借日光、隨日
而轉之故乎、何不思之甚也、月之所以借日顯光
者、陰陽交感之理也、人間夫婦、婦因夫貴、猶之月
借日光也、故曰、天地之道、造端乎夫婦、天人非二
理也、歷家乃以月之對日、如臣避君、故有圓缺、因
有圓缺、謂之轉避、殊不思人居下一方而觀有圓
缺、其光豈有圓缺哉、如果轉避、陰陽否隔、豈能相

交、何穿鑿之甚耶、日月並明而不相悖、以其相交、故並明不相悖、何轉避之有、由是言之、則星斷不能交日、不能交日而自明其光、則不隨日轉、其光不變矣、月無光、而借日顯光、故隨日轉、人居一方觀之、遂有偏正背面之殊、乃見光之圓缺時變也、豈不明白易曉哉、是故乾坤定位、而後有陰陽、陰陽相交、而後有水火、水火既濟、而後有五行、合之則一本、分之則萬殊、體雖同、而用各異、用各異、則

日月星辰體象迥殊矣故羲聖之卦表其體文王之卦明其用夫乾爲天天本在上坤爲地地本在下乃反名否何也蓋謂陰陽各居本位則二氣不隔不交今以月對日爲轉避豈非否隔乎陰陽不隔何以生化萬物可知斷無是理而爲揣度之臆見也故坤上乾下則爲泰泰者陰陽交而生水火也乾陽涵坤陰則爲離火坤陰育乾陽則爲坎水陰陽互藏互交以故生化不息以其陽中有陰故

陽極則陰生、而乾變爲姤、陰中有陽、故陰極則陽生、而坤變爲復、乾坤姤復、表陰陽進退衰旺也、氣有衰旺、則又有變化、此日月星辰、風雷水火、上石草木、飛走動植、體象紛紜、莫可數計、要不出乎六十四卦、三百八十四爻之變化、雖變化無窮、而陰陽五行之理、條貫不紊、其理不紊、故月是月、星是星、而水火土石一切物類、亦各有體象、不可混論者也、日月昭象於天、而人未明其體、以其能生水

火故以水火體象驗之是爲至理外此更不足爲據矣斷非臆見所可強定也是故天元厯理之論日月無異景岳之論陰陽皆似是而非不明至理徒以臆說惑人而已

論易理

或曰、治病不可偏陰偏陽、景岳以扶陽抑陰論醫、自謂原本易經、實則誤人不淺、而子駁之、是也、若謂易象本無此理、則未必然、試思夫子贊易於乾之彖曰、大哉乾元、又曰乃統天、坤之彖曰、至哉坤元、又曰乃順承天、夫坤何以不復言大、何以便言承天、坤之文言、並曰地道也、妻道也、臣道也、以地道而等之妻道臣道、明乎地陰不敵天陽也、

答曰、大哉至哉、皆贊美之辭、無所軒輊、夫太極動而生陽、靜而生陰、動極則靜、靜極復動、循環無間、而原其所始、則陽先陰後、陽倡陰隨、陽施陰受、爲造化自然之理、卽以先後倡隨施受、而觀其性能功用、則乾陽爲統天、而萬物資始、坤陰爲順承、而萬物資生、旣以順承爲用、而比之人情世事、則如妻道臣道也、故以乾比君德、而曰陽尊、坤比母儀、而曰陰卑、此尊卑二字、原從人情世事上立名、非

陽性動能施泄陰性
靜能翕鬪故不同陰
無陽不生陽無陰不
化故功用則一

陰陽之理固有尊卑所以言一陰一陽之謂道見得二氣流行生化萬物其性能不同其功用則一故曰大哉至哉皆極贊之辭何有尊卑哉益可知伏聖卦象止表陰陽流行生化進退消長之理並無文字語言更從何處見其有尊卑扶抑之理耶則尊卑扶抑之說全是儒家爲治世之道設喻而已

其於地天泰卦曰小往大來天地否卦曰大往小來

是明言陽大陰小也

旣是陽大何故更要扶之陰小何故更要抑之此

扶抑二字尤覺無謂

至復卦則曰復其見天地之心乎不單曰見天心而
合言曰見天地之心可見天地同賴此陽以爲主宰
天地間所重惟陽可知矣縱不言扶陽而扶陽之意
隱含言外

此說更會意錯矣何異景岳之言統易者惟陽之

謬見哉。夫太極未判，本無陰陽之名，陰陽歸根，仍是太極之體。故易初之一畫，即是太極之象。太極既判，則以一奇表陽象，一耦表陰象，二合璧，仍是易初一畫之太極。其六十四卦三百八十四爻，錯綜變化，以表陰陽進退升降之理也。爻象表陰陽，爲太極之用。太極爲陰陽之體，而用從體出。是故坤卦純陰之象，即是太極靜極之時。靜極則復動，故坤卦變復，即是太極初動之際。所以言復，其見

天地之心乎。天地之心。豈非太極渾元之體乎。是
觀其用之初動。見其體之所在也。世多不識。故聖
人明白指示。特言天地之心。敎人領會此意。由是
可知心爲一身之主宰。則主宰天地者。太極也。太
極渾元未判。尙無陰陽之名。陽者天也。今言主宰
天地者爲陽。何不竟言主宰天地者爲天可乎。豈
不擗其本而齊其末。方寸之木可使高於岑樓此之謂也。

後天之理皆錯。先生得毋仍其謬乎。更云扶陽之

意隱含言外，尤爲臆見而非理也。

故此扶陽抑陰四字，雖出朱註實本孔子，如云爲治世而言，則何不筆之於詩書春秋，而獨見之於易乎？詩書春秋論世間事跡褒君子、貶小人以明治亂之所由，原非論陰陽之理者。易象表陰陽進退消長之理，儒者用喻世事治亂之道，傳曰：陽，一君而二民，君子之道也；陰，二君而一民，小人之道也。是說出原委，羣疑冰釋。小人竊柄，則如二君也。想朱子亦因感觸時

事而爲此言不料後人竟作易理解會而其正論易理處如云於象上會得者深文王之詞早不是伏羲之意等說反茫然不肖可哂也

者欲使君子道長小人道消則世常治而無亂所以上文有淑慝之分四字豈非指君子小人而言不然陰陽流行化生萬物安有所謂淑慝哉若以喻言作實理則錯解易經刻舟求劍失之遠矣故易象爲大道之源醫理儒理俱在其中易辭爲儒者之言可用治世不可治病也若謂扶抑二字不爲治世而設試問天地陰陽流行生化誰能扶之抑之乎若果能之亘古以來可無災患矣盍再思

之

就使爲治世而言、亦必爻象確有此理、而後聖人言之、否則空言、早落邊際、非四大聖人共成天地間第一部言道之書矣、世儒操筆、多落邊際、賢人或有之、聖人則四通八達、面面俱圓、必無是也、

上節既云扶陽抑陰四字、雖出朱註、實本孔子、是硬坐聖人有此意、此節言確有此理、而後聖人言之、是又硬坐聖人有此言、余實不解先生是何意、

旣執偏見、則不自覺

其言之失也

虛贊聖人而不明聖

道反成誣聖

見也、若爻象確有此理、定可明白指示、卻從何處見之、斷不能含糊籠統而泛說也、聖人之言、旣面面俱圓、而無邊際、則扶陽抑陰四字、已偏倚一邊、豈反不落邊際乎、何不思之甚耶、乃硬坐爲聖人之言、不幾於誣聖乎、且與上節雖出朱註四字、又相矛盾矣、

試卽天地論、天體陽、包乎地外、地體陰、處乎地中、非陽大陰小、確証乎、

陽旣大矣而又扶之豈非更大陰旣小矣而又抑之豈非更小夫一陰一陽之謂道偏陰偏陽之謂災而扶之抑之反使其偏豈不害道而致災乎可見爻象斷無此理聖人斷無此言不亦顯然哉究實而論天不過清氣地不過濁滓形雖大小而陰陽之氣何有大小哉若有大小豈能生化萬物乎乃泥其形而昧其理不可以論陰陽卽不可以談易也

體天地之陰陽者、日月也。日陽月陰、日大月小、日萬古光明、月晦朔生死、且日行晝、月行夜、同運並行、而定晝夜四時寒暑、以日不以月、非陽爲主、陰爲輔乎？此節無所深義、聖人因日以定月、因月以定歲、因歲以分氣候節令。拙集論景岳篇末及辨日月體象篇均暢發其義矣。日行速而高、月行遲而低、世人觀之、以爲高者其形必小、低者其形必大、殊不知月借日光以爲光、故其形之大小等耳、月之本

體無光焉能知其大小哉以其借光於日光隨日轉人居下一方觀之故有晦朔弦望之異其月體豈有盈虧生死乎總因世人只能見形論形不知理之所在請觀拙集各篇自明可毋贅矣

又卽生人言之男子陽女人陰男帥女女從男夫爲妻綱敵也云乎哉

陽先陰後陽倡陰隨陽施陰受造化自然之理故易言乾統天坤順承諸義上已詳明矣且陽性旣

能帥陰、何故又要扶之、陰性既不能承陽、何故又要抑之、更可見扶抑二字、斷非聖人之意、亦非爻象之理也、

且孩提陽盛、生氣日進、自幼而長而壯而強、步步生旺、五十以後、陰氣主事、便衰而病、而老而死、步步死機、陽之關係生命也、如是扶陽抑陰、安可盡非乎、

若據此說、則必扶陽抑陰、爲醫學綱領矣、正是景岳似理非理之說、明明迴護景岳也、開首既云、余

駁景岳爲是乃又迴護之殊不可解也夫陰陽進退消長而萬物生長化收藏出於造化自然之理人爲萬物之靈稟陰陽太極之氣而同其機括試問少年生長之時豈止陽旺而陰不旺乎老年衰敗之際莫非止有陽衰而陰不衰乎何以見少年爲陽主事老年爲陰主事果爾則少年者皆當用涼藥助陰老年者皆當用熱藥助陽乎惟陽生命所關世之虛勞傷陰者多不可治莫非不關生命

乎可見仍是景岳之說、豈非迴護景岳哉、
又曰前已明言子駁景岳爲是、豈又左袒哉、今與子
論易、非論醫也、

答曰醫理且置、請問論易何如、

曰醫易俱作自聖人作醫聖人未嘗不能作易、作易
聖人未嘗不能作醫、但醫爲療病說法、着重在人身
一邊、從先天順講到後天、就教人順承後天、陰平陽
秘、足以治病便止、於易中逆追先天道理、不盡泄也、

醫爲療病說法固然但靈素之言從天地說到人身從人身說到天地互舉互證文如連環三才一貫之道暢發無餘先天後天道理原已包括於中在人自去領會先生將順承逆追打作兩橛還欠參悟請細觀靈素返究易經再論何如

易則全爲發明大道必盡究先天後天如何由後天而逆追先天原其所始要其所終前無古後無今包括二氏牢籠百家聖人盡性至命實學實在於此

此亦老生之常談也。夫原始要終，知生死之說，人皆熟聞，然其所以爲始，所以爲終者，又誰能知之？故曰：不知生焉知死？既不能知，徒執空言，正如盲者之摸象，摸着足者言象如柱，摸着尾者言象如帚，紛爭不決，明眼旁觀，未免失笑。是故雖爲聖人之實學，實爲吾輩所茫然，不過作老生常談而已。醫家聖人所不盡泄者，易聖人都盡發之矣。

聖人都已盡發，何故世間猶無明易之人乎？蓋所

謂盡發者、文字語言也、書不盡言、言不盡意、意不能盡理也、故曰善易者不言易、良以易理不在語言文字故也。世人但知文字語言所以仍不能明易也。

蓋醫明大道之一截、易明大道之全體、醫書豈真與易書比哉。

醫經與易經體同而用異。拙集屢申其義矣、既將先天後天、打作兩橛、遂有一截全體之見而不識

其體用所在也。

聖人韋編讀易，不聞讀醫。假年學易，不聞學醫，蓋以此也。

聖人爲治世之大道，不爲治病之小道。故言某未達，不敢嘗。然道之用有大小，而其體一也。其所系之重，猶先於大道。何故？蓋有性命而後有道德，功業保性命者，醫道也。其理則與易經同出陰陽太極之源，故體同而用異也。

若僅以爲治世說法淺之乎讀易實淺之乎窺聖人矣

知心之言聖人萬之
必然莞爾

聖人一生心事只爲治世若不爲治世實無一事連易也不作也且自格致誠正修齊治平何往非爲治世之道乎六合以內除治世事外更有何事六合以外存而不論者也正是先生淺視治世之道非余淺之乎讀易淺之乎窺聖人也豈不聞博施濟衆堯舜其猶病諸博施濟衆非治世之事乎

雖承虛贊、卻非知己

可知治世之道、聖人猶曰難周、而先生反淺視之、則是先生之淺窺聖人、固而淺之乎、讀易矣、

子之學有根柢、能靠實、內經、陰、陽、秘四字、所以翦裁諸醫家得失、抑其太過、補其不及、悉有規矩、不出準繩、得力乎此也、然惟其單靠實此四字、所以於易家聖人、從後天逆反先天功夫道理、轉不理會、據朱子象上會得者深、言上會得者淺、兩語作論、易丹頭、讀經先須明理、若靠實字句、卽執一不通、執中無

即所謂同出陰陽太極之源者

權猶執一也。况可靠實字句哉。若拘執陰平陽秘四字而不悟其理。卽不能知扶陽抑陰之爲害矣。所以景岳嘗誦陰平陽秘而反以扶陽抑陰爲醫學綱領。正因不悟陰平陽秘之理故也。是故得力在於悟理。醫理如是。易理如是。天下萬事自古及今之理莫不如是。卽所謂頭頭是道也。悟一陰一陽之謂道。所以知陰平陽秘精神乃治也。是故醫理卽易理也。形而上者謂之道。先天也。形而下者

苟能恬淡虛無自然
陰平陽秘所以先天
後天原是一貫非兩
微也

謂之器後天也恬淡虛無者先天也陰平陽秘者
後天也形上形下者逆追順承之旨也靈素固已
備論拙集太極發揮等篇頗詳其義先生或未之
察耶然卻非扶陽抑陰之功夫此宗功夫實非易
經道理也夫陰陽變化無方之謂易故聖人精蘊
在卦象而非語言可形容一涉語言文字便落方
隅卽非變化無方之妙理矣所以朱子云讀易於
象上會得者深言上會得者淺此真論易之丹頭

讀易之妙訣，非箇中人，誠不足以語。此今先生之意，豈以朱子爲非，反以拘執扶陽抑陰，硬作易理爲是乎？或者未曾理會得易經道理，將錯用其功夫也。

其實朱子本意，以人執泥爻象，但從言上探索，不復進求其所以然，故以二語喚醒之。猶佛家以見月忘指，提醒人一搬意思。

可見朱子正恐人執泥文字語言，欲以二語喚醒

即以其人之言還其人之病

人無奈世人仍不能醒，非但執泥爻象，并將扶陽抑陰之譬語硬作易理解會，而云爻象確有此理，正如執指作月，而實未曾見月，豈不辜負朱子之婆心哉。

羲聖畫卦原包全部易經道理

卦象月也，易辭指也，指固在月外，非包在月內也。世之讀易者多執指作月，鮮能因指見月者，苟能見月，自然忘指，何至拘執文字語言，而費唇舌哉。

但人苦無門悟入，故文王作彖詞，開示大段。周公作爻詞，發明隱細。孔子申文王周公之意，從後天兜轉先天，如子之書，謂一線穿成，豈四聖人不一線穿成乎？

兜轉先天者，想是謂無思無爲，寂然不動，感而遂通之意也。拙集出余一手，故一意貫串四聖之易，理則一貫，而意義不同。若謂文王卽伏聖之意，周公卽文王之意，孔子卽周公之意，豈不爲複詞贅。

語哉不成其爲聖矣箇中人自能領略也

如云卦彖爻繫各自爲易則易書當分四部不當合爲一經矣

扶陽抑陰四字原是後儒爲治世設喻本非卦彖爻繫之理四聖皆發明陰陽進退消長之理則共成一經雖爲一經而四聖各有意義不同故朱子云文王之詞早不是伏羲之意今先生之言是駁朱子也或者先生高見出於朱子則非余小子所

敢饒舌矣。

六十四卦，先儒或云定自伏羲，非始文王，此不必論。但文王作彖，已有大過小過、大畜小畜、大壯大有等卦名，凡言大者皆指陽，小皆指陰，可見陽大陰小，天地間至理。古聖人皆如此說，非出後人杜撰明矣。

天地間至理，既然陽大陰小，古聖皆有此說，則扶陽抑陰，斷非聖人之言，必非易理，更可見矣。何故一陰一陽之謂道，偏陰偏陽之謂災，陽既大矣，而

又扶之豈不更大，陰既小矣，而又抑之，豈不更小？則偏勝甚矣。斷非道也。易經豈有非道之理哉？偏勝爲災，聖人豈有致災之言哉？乃云爻象確有此理，而後聖人言之，得非昧經理，而誣聖人乎？圓覺經云：圓覺之性，如牟尼珠映於五色，迷者謂珠體實有五色耳。

再就太極圖言之，自古圖式不一，有易太極圖，有古

太極圖有周子太極圖、有來氏之圖、有道家太極圖、
圖式縱多、理無二致、總不出陰陽未判名太極、太
極動靜生陰陽、陰陽爲太極之用、太極爲陰陽之
體而已。拙集已暢發其義、譬如風雨晦明、變態萬
狀、總不出天地陰陽氣化流行之理、若泥其形而
昧其理、則惑於多岐、莫知道之所在矣。

試就此圖觀之。○上白者陽天也、下黑者陰地也、皆
後天也、惟中宮爲先天。

此圖爲太極動靜而生陰陽之初象。若據此圖，則陰陽固無大小。而先生言陽大陰小，天地間至理，則又自相矛盾矣。奈何而況圖象猶不能盡其理者，如天氣下降爲雨，下降者陰也；地氣上升爲雲，上升者陽也。陰陽變化無方，只可意會，莫能言宣。言不能宣，圖象焉能盡其理哉？故曰：赤水元珠，得之象罔，則泥象者猶失之。何況執泥文字語言，去理更遠矣。

得意忘言未能得意
則必死於句下

以後天言，則天地分列陰陽。自先天言，卽天亦陰也。惟先天一點，乃真陽耳。

觀先生之言，自丹書中來。或者未曾理會得易經道理，故被丹書所迷也。丹書稱先天爲陽，後天爲陰，每每牽引易經似是而非，反乖易理。夫易有太極，而生兩儀。兩儀爲天地。天地卽陰陽，故又言太極動而生陽，靜而生陰。太極在天地未分以先，故名先天。天地未分，尚無陰陽之名。豈可鑿稱先天。

爲陽乎、如可稱陽、何以名太極哉。天地既分以後、陰陽五行俱全、豈可鑿稱後天爲陰乎、如可稱陰、何以名陰陽五行哉、豈不將名目理義全然紊亂乎、凡事有名有義、而理在其中、所以顧名必當思義、名義且不識、無怪辨理舛謬矣、可見丹書爲臆說、實非易理也、景岳旣迷丹書之言、而以世儒扶陽抑陰治世之喻言、硬作易理、又以之論醫、牽引內經陰平陽秘之文、而不辨其理、先生又承景岳

妙語解頤

之謬惜哉。且如先天爲真陽，豈後天爲假陽耶？以其爲假陽，故自先天言，卽天亦陰也。天可稱陰，世間男子亦可稱爲女人也。故有巾幘丈夫之名乎。可發一笑。天旣稱陰，將以何字稱地乎？敢問。

此陽胚胎天地，包含萬象。仙佛聖賢，均從此出。道得之而仙，釋得之而佛，儒得之而聖人。

天命之謂性。朱子曰：命猶令也，性卽理也。天以陰陽五行化生萬物，氣以成形，而理亦賦焉。此天字、

釋典曰後去先來作
主人以一靈賦於太
極故爲先來五行陰
陽消散則太極毀而
靈始去故曰後去

正指先天而言蓋一靈之性賦於太極太極生陰
陽五行之氣以成形則謂之生若命令之自上而
下也氣化既盡則五行陰陽消散而太極毀則靈
去而謂之死所以言原始要終知死生之說是故
萬物之生莫不稟有先天之氣若草木無情則但
有氣而無靈耳今曰道得之而仙釋得之而佛儒
得之而聖豈止仙佛聖人方得此氣其餘衆生所
未有者乎且先天尚無陰陽之名故稱太極今言

此陽胚胎天地，此陽究爲何陽乎？如此見解，恐少參悟功夫，或未可以談易也。

三教同歸，大易秘旨，盡性至命功夫，全在乎此。懸聖心傳，未便明說，故以扶陽抑陰，指示門徑。扶陽者，扶此先天之陽也；抑陰者，抑此後天之陰也。

以治世之喻言，作易經之實理。又以丹書先天爲陽，附會其說，此陽既能胚胎天地，尤必賴人扶之。此人者，何人耶？得非超出盤古女媧者乎？觀道門

中書自老氏以下惟魏伯陽參同契張紫陽悟眞
篇猶不乖經旨與儒理異用同歸其後丹書如唱
道真言性命圭旨等尙皆正宗不失老氏之意餘
則支離穿鑿臆說橫陳每必牽引易經作門面竊
祖師名目爲標幟甚至千奇百怪流於邪僻未曾
潛心參悟者無不爲其所惑是以旁門左道邪敎
繁興流毒於世實堪太息如景岳之大言煌煌不
外丹書作藍本將易經靈素之文牽合附會眩惑

於人良可悼也夫厯聖心傳指示者止有惟精惟一允執厥中八字而已未聞有扶陽抑陰之說也精一者卽至誠無息之旨也執中者卽致中和位天地育萬物之道也是故中庸爲厯聖相傳之心大學爲厯聖相傳之道道不出乎心心不離乎道而其源皆出於伏聖之易象也旣曰執中又曰中和更曰中庸再曰君子而時中則無論先天後天陰陽氣化流行生成萬物斷無偏倚一邊之理旣

爲聖人、斷無偏倚一邊之言、扶陽抑陰四字、偏倚已極、原是後人爲君子小人設喻、豈可硬作易理、誣爲聖人之說乎、若不爲治世設喻、試問先天後天、陰陽生化自然之道、人將何法以扶之抑之乎、於此亦可省悟其理矣、

猶之佛家、教外密傳、凡夫安得知之、若云爲治世而言、抑何談之容易、靜讀繫詞上下傳、自然見得耳、余固凡夫、雖靜讀詞傳至終身、實亦一無見得也、

虛靈之性無法不有
而無一法可得故曰
無法可說是名說法

若有一毫見得，卽有一毫執着。有一毫執着，卽不可論易理也。先生此言必有見得儒家之教外別傳乎？教外別傳是在易理之外，更非余所能領略矣。佛家稱教外別傳爲釋迦秘旨，自達摩始傳中國，以非語言所能指授，故稱教外別傳，而以棒喝、監指、擎火、滾球等點化人，並非密傳也。想先生亦係平日所誤聞耳，且夫用之則行，舍之則藏，一日克己復禮，天下歸仁，則聖人治國平天下，正是盡。

所以。云。著。道。一。以。貫。

兩。擬。則。不。一。貫。矣。

性至命功夫。所以言能盡其性。則能盡人之性。能盡人之性。則能盡物之性。是體用一貫之理也。明德爲體。親民爲用。止於至善。則體用完全。然明體尚易。達用尤難。體者。道也。用者。權也。故曰可與。適道。未可與權。又曰。執中無權。猶執一也。今將體用打作兩橛。以難者反視爲淺易。看得盡性至命四字。如買古董者。但見其希奇寶重。實不知其用處。嗚呼。如斯談儒理者。訓詁之學也。不知儒理焉能。

知易理哉、

嗟乎、道之不明也久矣、景岳昧於易理、執迷丹書、先天爲陽、後天爲陰之言、又要穿鑿扶陽抑陰、四字、遂臆造陰多陽少、陽弱陰強等似是而非之說、使人難辨、大壞軒岐宗旨、爲醫門魔障、遺害不淺、余故辨之、以明軒岐之正道也、今先生拘執易辭、言陽大陰小、爲天地間至理、陽既大矣、又要扶陽、陰既小矣、又要抑陰、自覺刺謬、不得已去丹書中、

尋出先天爲陽、後天爲陰二語來、言扶陽者、扶先
天之陽、抑陰者、抑後天之陰、觀起首、言乾坤、言泰
否、言天地日月、男女老少、陽大陰小、原說後天之
陽、辨論到理屈難申、忽改言先天之陽、先天既不
可稱陽、而前後自相牴牾、此所謂遁辭也、先生之
言、雖與景岳小異、而病則同也、試思先天爲根本、
後天爲枝葉、若云扶先大根本、理上還講得去、若
云抑後天、則難解矣、譬如種樹、根本固宜培、豈枝

素性噶破

葉必當伐乎、如此粗淺意義尙且講不過去、還說是歷聖相傳、指示之門徑、如此門徑、則爲旁門曲徑、必使人走入魔道、斷非歷聖之所指示者、若不急急省悟、恐爲害非淺矣、且觀先生之言、假名論易、陰爲迴護景岳、明眼自見、不可欺也、何故、若先生之言爲是、則余之駁景岳爲非、易象若有扶陽抑陰之理、卽爲造化自然之道、則治病必當扶陽抑陰爲綱領、是景岳爲是、而余爲非、則陰平陽秘、

不可爲醫學綱領矣。乃言不曾迴護景岳，眞欺人之談哉。然而拙集卻最喜人批駁，何故？蓋凡至理多難解，會愈辨駁，則愈明顯。拙集中多入理之談，而博洽聰明之人猶且疑惑不解，况其下者乎？或至後世，橫生謗議，則余不及登答，遂成千古疑團，豈非憾事？况余以一得之愚，亦不敢自信爲是，若有當世高明不吝賜教者，實爲余之幸也。尤跂余望之耳。

平心論

覽醫籍中言景岳之偏者，不一而足。但畧而不詳，仍不能救流俗之弊。余故考其致偏之由，而備論之。世之喜景岳者，猶不省悟。與余駁詰，嗚呼！是誠何心哉！余豈故爲高論，以訾議先輩乎？余之言雖異於景岳，而心則同也。夫景岳之心原欲壽斯民於萬世，未嘗非美意也。無如限於學識，見道未真，而又自用太過，因見劉河間、偏主涼瀉、朱丹溪言陽常有餘，欲矯二

家之偏只宜指出病端申明軒岐宗旨則盡善矣乃不出此而又臆造陽常不足之論不自覺其流弊甚於劉朱何故蓋劉朱各本內經一節之義以立言不過發其未發原非全經之理稍通醫學者卽知其義則不蹈其偏而不爲害矣景岳旣造陽常不足之論乃多方引證以實其說將易註扶陽抑陰與內經陰平陽秘牽引附會而云出自文王周公孔子軒岐諸聖之旨非爲一己私言以聳人耳目所以不獨淺學

被愚雖通文墨而自謂知醫明易者猶篤信其言如
與余駁詰諸人是也此其爲害故甚於劉朱矣試思
內經不曰陰平陽和而曰陽秘者何也緣陽性動而
發泄發泄太過真元傷耗故特用一秘字此聖人之
意深矣若曰扶陽則必更使動泄抑陰則必使其不
平此扶抑與平秘理義相去不啻天壤而景岳牽合
混說以張大門面故使信服者衆若醫易大寶論等
篇是也以陰陽至理不明論治內傷則偏於助陽六

氣之邪不辨則傷寒。瘟疫混論其弊實難枚舉又以
博洽之才逞其筆勢議論縱橫易於動人故遂家傳
戶誦大行其書其信奉劉朱二家者未有若是之多
也故余不得不徹底窮源抉其病根以當曉鐘一擊
使人知軒岐仲景宗旨所在而劉朱各家之偏亦可
因之以見是故區區之心未嘗異於景岳不知義理
所在者不能諒余之心矣夫陽倡陰隨爲造化自然
之道故陽能帥陰而陰賴陽之煦通以生長陰能和

其理

若扶陽抑陰則使陽
強不能密陰氣乃絕

陽而陽藉陰之翕闔以固密此陰陽自然之性能所
以經言陽強不能密陰氣乃絕陰平陽秘精神乃治
也若病變不常或當扶陽或當抑陰惟應隨宜而施
安可執爲一定之法乎後學之不明聖道者實由歷
來諸家駁雜之說有以障之雜說愈多則聖道愈晦
而生民之厄愈重稍具知識者能不爲之痛心哉且
靈素十餘萬言而三才生化之道疾病傳變之由詳
晰備論而治法則多針砭而少方藥以上古所宜也

迨夫仲景紹聖軒岐論傷寒雜病，綱舉目張，必詳辨脈證，而後始立一方，又反覆辨其疑似異同，則方藥隨宜變換，其精詳若是，而慎重若是，蓋治病制方固難，而辨證爲尤難也。以後諸家著書，則大不然，不詳脈證，但題病名，如云傷寒者用某方，傷暑者用某方，兼某病者用某方，複辭贅語千篇一律，後學讀之，既不知辨證，記誦許多方頭，每臨一病，徧試其方，幸而合者鮮矣，故有不藥爲中醫之說，良可慨也。既以諸

家之書辭義淺近而易讀則反以聖經爲宜古不宜今終身不曾寓目而亦終身稱爲醫者譬如舉業家不讀四書五經但誦時文數百首每遇一題卽以相似語言湊集成文不知義理所在其可乎否耶嗟乎醫道如斯亦可謂掃地矣是故學者必先參究靈素仲景之文通達其義理一若吾心之所欲言者然後博覽諸家如執衡鑑妍媸純駁莫能逃吾心目披沙揀金資益學識每臨一病胸無成竹惟審其虛實陰

陽表裏寒熱設法制方求其合病而止藥雖不同古
方法度自然合古如葉氏醫案之所以爲傳仲景心
印者正因其善能變化而無絲毫執滯仍不出聖道
法度故也學者必由是而學也方爲醫道正宗否則
盡是旁門左道甚則流於邪僻不獨害世或至自戕
者有之可不畏哉可不慎哉雖然景岳所論陰證似
陽戴陽格陽等證誠有發古未發之功學者必當參
悟其理悟理方能辨之真自不可因其所短而沒其

所長也是爲平心論耳

醫門棒喝卷三終